

AKASHVANI AIZAWL
REGIONAL NEWS UNIT
REGIONAL NEWS BULLETIN

Friday, May 1, 2026

Time - 2:30pm - 2:35pm



MBSE RESULT ANALYSIS

Mizoram Board of School Education (MBSE)-in kumin matric result leh pawl 12 result a tihchhuahah exam zat atanga chhûtin sorkar sikulte pass percentage a hniam ber a, deficit school-te pass percentage a sang ber.

Akashvani News Aizawlin result tihchhuah tak dinhmun a zirchiannaah matric result leh pawl 12 result-ah khan Mizorama sikul hrang hrang - sorkar sikul, deficit sikul, aided sikul, lumpsum sikul leh private sikul zingah sorkar sikul pass percentage a hniam ber ve ve a; deficit sikulte pass percentage a sang ber ve ve a ni.

Kumin matric result bikah khan sorkar sikul pass percentage hi zaa 72.07 a ni a, a sang ber deficit sikulte pass percentage chu zaa 96.92 niin, pawl 12-ah khan stream pathum - Arts, Science leh Commerce belkhawmin pass percentage sang ber deficit sikulten zaa 93.97 an nei a, a hniam ber sorkar sikulten zaa 81.15 an nei a ni.

Hetihrial hian nikum 2025-a heng sikul then hrang hrangte pass percentage leh kumina an pass percentage chhutin sorkar sikulte pass percent a pung nasa ber thung a; kum 2025 nena khaikhinin kumin pawl 12 bikah hian sorkar sikulte pass percentage hi zaa 9.62-in a pung a; matric-ah pawh sorkar sikul pass percent hi nikuma an pass percent atangin zaa 4.06-in a pung bawk. Matric bikah hian sorkar sikul aia pung tamte chu deficit sikul zaa 4.30 leh aided sikul zaa 4.29-te an ni.

Data kan lakkhawm theih chinah deficit sikulte hi matric leh pawl 12-ah hian zirlai exam zat atanga pass zat nei tam ber an la ni deuh char char a; Kumin hian sorkar sikulte hian a vawi khat nan pass percentage zaa 80 an nei a, hetihrial hian sorkar sikulte hi pass percentage hniam ber an la ni char char bawk.



ANIMAL INSURANCE

Ran vulhtuten an ran vulhte an thih palh pawha sum an hmuh theihna tura Mizoram sorkarin National Insurance Company (NIC) thawhpuia 'Animal Insurance' a kalpui mekah nimin thleng khan vawk 667 insurance tih a ni tawh a, ran dang - bawng, sial, beram leh kel vulhtu zingah insurance ti an la awm lo.

NIC hotute hnen atanga Akashvani News Aizawl thudawn danin, Aizawl district-ah vawk insurance tihsak 371 awm tawhin a tam ber a; Siaha, Serchhip leh Saitual district-ah insurance ti an la awm lo a ni.

Insurance tih man hi a tira sorkar nena inremnaah chuan GST chawi ngai tura ngaih a nih avangin GST chhût tel a ni a, amaherawhchu central scheme-ah GST chawi a lo ngaih leh si loh avangin ran insurance tih man hi a tlawm ta zawk niin NIC hotute chuan an sawi a, vawkah pawh a tirah insurance tihna man tur hi GST chhût telin vawk pakhatah Rs 292 an chawi tur angin puan a ni a, MoU-ah pawh ziah lan a ni. Mahse, central scheme-ah GST chawi a lo ngaih leh si loh avangin vawk vulhtute hian Rs 248 chauh an chawi a ngai, an ti.

NIC hotute chuan ran insurance hi vawk bakah bawng, sial, beram leh kel-ahte tih theih ni mah se nimin thleng khan vawk vulhtute chiahin an vawk vulhte an insure

thu an sawi a; vawk vulhtute zingah pawh hrileng a awm rih loh avanga insurance tih kher ngai ti lo engemaw zat an awm thu an sawi bawk.

((VOICE CAST - puan tawh angin Animal Insurance hi vawk, bawng, sial, kel leh beram-ah a tih theih a, insurance tihsak rante hi khuarel chhiatna leh hri avanga an thih chuan ranvulhtute hnenah NIC hian an ran vulh hlutna hùà chhùt pawisa an pe dawn a - an len dan a zirin vawkah hian Rs 7200-24000 inkar hmuh theih niin, bawng leh sialah hian Rs 14000 - 48000 leh kel leh beram-ah hian Rs 1680 - 5600 hmuh let theih a ni. Ran insure te hi an lo thih palh a nih chuan ran vulhtute hian kim takin insurance pawisa dilna atan pawimawhte an neih kima, insurance an claim a nih chuan NIC hian a rang thei ang berin an chinfel sak tur a ni a, NIC hian an tih turte ni 15 chhunga an ti zo hman lo a nih chuan ran vulhtute hnena sum an pek tur hi zaa 12-in a pung dawn a ni - Johny Lalrinchhana, Akasahvani News, Aizawl))



SIAHA DIST VC BYE ELECTION

Siaha District chhunga VC 6 By Election nimin khan neih a ni a, vote tla te chhiar chhunzawm nghal a, A pumpui ah BJP in seats - 4 la in Independent Seat-2 leh ZPM in seat - 1 an la a ni.

He inthlanah hian Noaotla -III seat 1 inthlanna ah -BJP in an la a, Thosai - seat 1 thlanna a ZPM+INC+MNF tangho Independent candidate in a la a, College Vaih-II - seat 1 inthlanna ah BJP in an la

Meisavaih 'E' seat- 2 inthlanna ah BJP in seat la in ZPM in seat 1 an la a, Khaikhy- seat 1 thlanna ah BJP in la in Tipa V – III ah ZPM+INC+MNF tangho Independent candidate in seat 1 a la bawk a a ni.

Inthlanna hi tluang tak leh felfai taka neih a ni tih kan corr chuan a sawi.



MUHCS

Mizoram sorkar chuan tun sorkar kum kal mek 2026-27 atana Mizoram Universal Healthcare Scheme (MUHCS) 2.0 a kalpui hnuah nimin thleng khan damlo 2,615 enkawlna senso atan cheng nuai 700 a pechhuak tawh.

Mizoram State Healthcare Society hotute chuan Akashvani News Aizawl zawhna chhangin, sorkar kum kal mekah MUHCS 2.0-ah hian MUHCS kalpuitu damdawi-inite hnenah damlo an enkawlna senso rulh nan cheng nuai 700 an pek chhuah tawh thu leh hei hi damlo 2,615 enkawlna senso a nih thu an sawi a; thla hmasa chung khan damlo enkawlna pawisa hi tum 2 pekchhuah niin, kar hmasa khan cheng nuai 400 leh nimin khan cheng nuai 300 an pechhuak a ni.

Healthcare Society hotute chuan damlo bill an dawn reng thu leh a tahtawl tê tain pawisa an pek chhuah zel thu an sawi a, damdawi-inite hnena damlo enkawlna senso pe turin an inbuatsaih leh mek thu leh karleh lamah pawh khian an pek chhuah leh dawn thu an sawi.

MUHCS 2.0-ah hian inziahlul theih hun hi tun thla ni 15 thleng hawn niin, online hmangin muhcs.mizoram.gov.in ah inziahlul theih a ni a; sorkar hnathawkte, pensioner-te leh golden card neite chu inziahlul a ngai ve lo.

